

欽定剿平粵匪方略

欽定勦平粵匪方略卷一百五 甲寅年

八月十八日 甲寅 向榮奏言該逆自七月下旬以

來疊被官兵痛剿拏獲賊目及城中逃出難民  
僉稱陸路賊匪四旬之中先後殲斃已不下三  
萬人精悍賊黨殲除殆盡現在城內之賊均經  
膽落已往調賊渠韋俊羅大綱聚集湖北安徽  
水陸各賊來此與官軍決戰如其不勝別圖竄

擾之計各等語臣探得上方橋西各營該逆均已加高壁壘開挖濠塹並不出戰顯有固守待援之意自橋東兩營被我軍奪據後該逆始不敢渡河而東惟是橋西賊營均與城近而雨花臺賊營又可就近馳救必先斷其應援而後可攻其營壘我軍始不致腹背受敵臣密飭總兵明安泰等帶領兵勇於八月初四日進剿該逆

瞭見我兵伏匿不出僅於穴中施放槍礮相持  
約一時許遙見通濟門出賊三千餘人意欲要  
我歸路明安泰督同張國樑以兵勇一半攻營  
一半回拒正酣戰間張國樑奮入賊隊遊擊王  
浚催兵繼進逆勢不能抵敵均向通濟門敗走  
我兵跟蹤追勦雨花臺內之賊約千餘人又來  
包抄亦被我伏兵全數截住賊衆大潰各營之

賊一意堅守始終不敢出營接仗臣又訪得太平門外時有奸民貪利與賊貿易因又密派守備李定太蔣錫光帶兵五百名馳往截拏先將長髮賊拏獲二十餘人殺斃三十餘人餘皆向城逃回遂將該處買賣街焚燬拏獲貿易數十人分別懲處伏念臣自上年二月抵金陵後該逆每戰輒敗輒固守以老我之師匱我之餉彼

轉得分其兇黨四出攻擾使我兵力處處爲其牽綴自江路斷絕以後太平資糧又被焚燬聞其火藥尤少該逆大困不得不盡力與我相抗此閏七月望後所以悉其醜類屢次殊死戰爭也惟是水師紅單僅二十五隻拖船亦祇六隻奉

旨調撥下游陳國泰紅單或十號或十五號現在未能

前來而上游楚皖賊船蟻聚蕪湖江南及兩梁山者不下數千將來愈集愈多萬一師船上攻不能迅掃一空而我礮火或有不繼賊船順流乘風而下一經退守勢難再上未免前功盡棄實屬萬分可虞至於浦口一路該逆在彼紮營與九洲洲賊營聲息相通必須先將此處賊營攻燬始可杜其北竄惟須下游水師會勦方能

有濟臣已疊次嚴飭總兵武慶李德麟等水陸  
會籌亟圖埽蕩所慮吳全美師船已單儻再回  
攻浦口賊船乘虛而下復與金陵陸路相通事  
機一失尤爲可慮此不能不專望於江北水陸  
各營也此時已將水路接濟斷絕再將陸路設  
法嚴斷該逆萬難久延必將悉其逆黨與我力

戰臣仰秉



廟謨儻能再獲大勝則辦理更有把握而廓清有期矣  
向榮又奏言臣查該逆於前月上旬竄擾九洑  
洲一帶其地距浦口甚近距武慶營盤與周希  
濂艇船均不過數里當時並不實力攻勦任賊  
從容紮營不知是何居心臣前奉

旨分提各船原以扼勦金陵上游今紅單連破賊船不  
下千號業已扼駐采石磯截斷江面水路極爲

得手無如東西兩梁山陸續駛回賊船已有二  
千餘隻皖楚大幫又將趕回蕪湖嘯聚日多太  
平尙無兵駐守紅單中流砥柱喫緊萬分若使  
調回攻勦不特將來上攻匪易賊船順流直下  
又將蟻聚金陵使陸路之賊困而復蘇水路之  
舟絕而復續萬一連檣北渡浦口勢益可虞或  
再下竄瓜州則我船更應接不暇矣臣愚以爲

賊之竄擾浦口江面者跡雖北窺實欲牽掣我師之後若紅單堵住上游使賊船無路下駛我得節節布置水陸會兵由太平以至蕪湖逐漸扼勦而上賊船雖衆亦可漸次掃除前奉

旨添調陳國泰之船旣因瓜州攻勦喫緊不能前來吳全美祇有二十五船葉常春之船又未趕到其勢已孤若一經奉調回勦帶兵官有辭可藉正

可乘此折回大局一壞實屬不堪設想所有浦  
口九狀洲賊營武慶旣奮勇由北岸進剿李德  
麟有船一十九隻豈尙不足圍攻縷計下游戰  
船除陳國泰所領二十五隻之外尙有周士法  
陳世忠分帶各項艇船亦不下數十隻現又造  
有多槳快船以之進攻洲城賊巢較紅單尤爲  
便捷誠如

聖諭所云卽或李德麟各船未能得手亦可就近將周士法陳世忠之船分撥協勦不必專調吳全美紅單駛回以致顧此失彼掣動大局奏入

上命軍機大臣傳諭托明阿向榮陳金綬雷以誠曰金陵逆匪自七月下旬疊被官兵痛勦此次上方橋賊營復經向榮撥派兵勇攻勦獲勝現在紅單船扼駐采石磯截斷江面水路極爲得手惟東西梁山賊船

陸續駛回已有二千餘隻皖楚大幫又將趕回蕪湖  
太平現尙無兵駐守金陵上游爲逆賊所必爭吳全  
美紅單船僅二十五隻葉常春師船尙未趕到該大  
臣奏稱若調回攻剿不特將來上攻非易賊船順流  
直下又將蟻聚金陵萬一北渡浦口更屬可虞所慮  
情形甚屬周密以現在而論自應多撥船隻扼住上  
游使賊船不能下駛爲最要機宜著托明阿等仍遵

前旨於陳國泰所帶船內分撥十隻或十五隻溯流而上與吳全美師船合力堵剿至九洑洲地方賊營距浦口甚近陸路有武慶營盤水路有周希濂艇船皆去賊營不遠何以任其從容布置於前又不能奮力攻剿於後所有浦口洲地賊營著卽責成武慶由北岸進剿李德麟現有船十九隻足敷圍攻著托明阿等卽嚴飭該員等迅速攻燬儻仍前怠玩不知奮

勉卽從嚴叅辦至下游紅單拖罾廣艇等船共有八九十隻又有新造多槳快船如李德麟各船不能得力並可就近將周士法陳世忠之船分撥協勦托明阿現已馳抵軍營著卽統籌全局與向榮和衷商辦毋得稍分畛域奸民接濟賊營火藥必應嚴行禁絕前已諭知陳金綬雷以誠著托明阿向榮嚴飭各營並地方文武明查暗訪一體搜拏毋稍疏懈



同日駱秉章奏言官軍進逼通城立營城外該匪負嵎抗拒於六月十七日分股前撲營盤訓導江忠淑等分隊抵禦勇目鄢世堂唐遠祚等首先陷陣斃賊數十名賊卽敗卻回城守備徐統緒乘勝追勦逼近濠內伏賊突出徐統緒被賊矛攢傷殞命署千總楊文元署把總王金福署外委楊登岸向前救護同時陣亡賊仍收隊

入城不出十九日賊復分路來撲當被兵勇擊退殺賊四十餘名生擒十一名七月初四日賊復分數路前來撲營並潛分一路抄出營後江忠淑等及平江團紳督勇分路抵禦先將營後一股擊敗合力痛勦轟斃賊匪三百餘名初十日官軍分路攻撲城垣賊匪亦分路來撲楚勇及平江各勇分路抄截斃賊四百餘名內有執

大黃旗賊目四名十八十九二十二十一連日  
鏖戰復斃賊七百餘名二十九日賊匪大隊齊  
出江忠淑等督勇嚴陣以待候其撲近槍礮齊  
施斃賊約二百餘名奇兵從後抄出又斃賊百  
餘名賊陣大亂陣斬僞軍帥蔡姓逆目廖四廖  
六等閏七月初七日夜賊忽開城由北路潛遁  
江忠淑等偵知派勇四路截擊斃賊三百餘名

奪門直入復斃賊百餘名生擒八十餘名奪獲  
旗幟器械多件此克復通城之實在情形也現  
在通城股匪倏分倏合者尙有數起人數約二  
千有餘亟應次第剿滅免滋後患陣亡之守備  
徐統緒等應請

旨交部分別議卹奏入

上諭內閣曰賊匪竄踞通城屢被官兵攻剿殲斃多名

閏七月初七日夜賊匪潛開城門由北路逃竄江忠  
淑等偵知帶勇四路截擊斃賊三百餘名奪門直入  
立將縣城克復現在通城餘匪尙未淨盡著該撫督  
飭兵勇迅速搜捕務當盡數殲除毋留餘孽所有在  
事出力各紳勇著查明酌保陣亡之守備徐統緒著  
交部從優議卹署千總楊文元署把總王金福署外  
委楊登岸同時被害均著交部照署任議卹

二十二日

戊午

袁甲三奏言據江浦等處節次來

稟該逆於江浦下新灘等處添設二營並踏平

蘆葦通路三條圖踞浦城以通和州烏江一帶

又分水陸兩路竄擾和州於和城外江口之鍼

魚嘴添築濠塹又有賊船二三百隻停泊烏江

登陸者四五千人四出擄掠直至和州北鄉之

濮家集距全椒南界河岸僅十餘里查全椒爲

北路門戶儻有疏虞則滁鳳一帶全行震動此時雷以誠奉

旨留揚和含一路前經和春福濟等飭派署臬司恩錫馳赴該處扼要堵截曾否到彼尙無確信臣已派參將吉連帶兵五百名前往關山一帶擇要堵禦並令廬鳳道張光第帶兵三百名赴滁和各路鼓勵團練以助聲援至臣前擬偏師繞赴

南路攻復各城等情應俟東南賊勢稍定再當酌量前往總期防剿兼籌斷不敢顧此失彼奏  
入

上諭曰所擬亦是現已有旨令雷以誠迅赴和含以後情形汝自斟酌略遲亦可

同日和春福濟奏言查江面師船屢獲大勝賊勢頗蹙游弋甚難南則軼入徽州甯國北則軼



入江浦和州築壘浚濠意存持久茲據全椒縣知縣陳麒昌稟稱賊於八月初七日水陸並進擾踞和州又於鍼魚嘴挑築濠塹賊船愈聚愈多皆自上游駛下初九日又有賊船三百隻停泊烏江登岸者四千人四出抄掠直抵全椒南境等語伏思和州爲廬營東障而全椒爲東來餉道所必經若有疏虞則北震滁定西擾廬

營防勦之師刻不可緩臣等卽飭署臬司恩錫  
統帶熱河兵四百名東河標兵三百名壽州營  
兵三百名廬州營兵一百名馳赴全椒相機防  
勦並飛咨揚營速撥兵勇委果敢之將帶至江  
浦聯絡聲勢應援協防以絕北岸賊蹤而扼臨  
淮前路此時托明阿已抵揚州接辦軍務仰懇  
天恩仍飭雷以誠統帶兵勇一千名馳赴和州扼守烏

江則兵力較厚可以遏北竄而制西侵俾臣等  
併力攻廬而袁甲三亦得統師南進數道並攻  
庶剿辦易於得手奏八

上命軍機大臣傳諭和春福濟曰和州爲廬營東障而  
全椒爲餉道所經設有疏虞則滁定一帶全行震動  
於江北大局關繫匪輕必須亟籌防剿已有旨諭令  
雷以誠馳赴和州相機進剿其能帶兵若干尙難豫

定已令托明阿酌量情形辦理該提督等卽迅飭署  
臬司恩錫統帶熱河等處官兵前往全椒力遏賊衝  
毋稍延誤袁甲三因北路緊要仍駐臨淮現派參將  
吉連帶兵前往關山擇要堵禦並令廬鳳道張光第  
帶兵赴滁和各路鼓勵團練亦可與恩錫聲勢聯絡  
互相援應該提督等務隨時知照袁甲三防剿兼籌  
以遏逆匪北竄之路

上又命軍機大臣傳諭托明阿陳金綬雷以誠曰現在和州情形益形喫重堵剿之師刻不可緩雖有恩錫統兵前往恐攻剿尙難得力此時托明阿已抵揚州瓜州軍務自可督同陳金綬等妥籌辦理著雷以誠於接奉此旨後酌帶兵勇卽日馳赴和州扼要駐紮如瓜州軍營兵勇不敷分撥卽將恩錫帶往之兵歸雷以誠調遣擇要布置務須悉力剿除毋任肆擾至

江浦地方爲南北咽喉若水陸兵勇協力同心及早  
攻剿何至任賊上竄以致重擾和州該大臣等務當  
懍遵疊次諭旨迅將九洲等處賊營剋期攻燬並  
督飭武慶等嚴密防守不得再有疏虞

上又命軍機大臣傳諭裕瑞駱秉章曰自逆賊竄踞金  
陵分擾揚鎮繼復攻陷安慶廬州等處蹂躪再及武  
漢長江之險半爲賊占皆由我軍僅能扼截陸路而

水師戰船不敷堵剿以致賊匪橫行江面恣其奔突  
近來紅單艇各船漸集瓜州等處卽獲勝仗向榮  
所派之兵亦收復太平進剿至采石磯以下湖南曾  
國藩統帶兵船現已沿江東下直抵金口距武昌僅  
六十里是剿賊兼賴水軍已有明驗惟近日逆賊竄  
近江西並恐另股由池州甯國進犯徽州窺伺浙境  
武漢以下金陵以上如安慶九江等處居中扼要之

地尙無戰艦阻當應廣籌製造四川地方完善多產  
材木購料興工較爲便易著裕瑞督飭湖北藩司夏  
廷樾辦理戰船以資攻剿或在川購造或但購材木  
籌撥銀兩帶赴湖南製造與駱秉章迅速商辦前據  
駱秉章奏該員已由辰沅赴川此項戰船如由川之  
涪江取徑辰沅勢在曾國藩之後若由夔巫上游徑  
赴荆江直逼漢水當可與曾國藩會合俟江漢道通



卽可節節攻剿截斷安慶九江兩路賊船著裕瑞與  
夏廷樾悉心籌議將如何辦理之處迅速具奏至湖  
南應備船礮前經紳士丁善慶等設局捐辦著卽趕  
緊添造多多益善駱秉章務飭該紳士等分投勸捐  
庶可多修戰艦肅清江面

上又命軍機大臣傳諭陳啟邁曰現在逆賊竄擾沿江  
各處吳全美師船已進徧東西梁山其瓜州至焦山

一帶有紅單拖罾廣艇各船上下橫截曾國藩水師亦駛至嘉魚金口等處不日克復武漢江路已頗得手惟自安慶至九江中間扼要之區尙無師船攔阻致賊黨得以任意往來江西前造戰船近日能否駛至九江以資攻剿該省素產材木並著陳啟邁督飭所屬購料加造若干隻派幹員管帶出江與上下游戰船互相策應爲掃盪賊氛肅清江面之計卽如吳

城等處賊船已被勦敗退因我軍缺少船隻故未能窮追可見水陸兩途必當兼備著陳啟邁趕緊設法竭力籌辦

二十四日  
庚申陳啟邁奏言武甯餘匪復邀興國

匪黨千餘由瑞昌邊界至武甯之箬溪地方分水陸兩路於閏七月二十四日竄至建昌涂家埠時值續調之署千總哈玉麟帶領章武軍練

勇三百名進剿適至該處卽會同建昌縣知縣  
景瑞迎頭堵剿該匪旋向德安竄去稟請撥兵  
勦捕並據已革總兵趙如勝稟報現有逆船四  
五百號馳入南康府屬湖南灣泊各等情臣查  
湖北興國大股逆匪先擾武甯繼竄義甯因被  
該州兵勇鄉團屢次擊敗復與興國逆黨竄擾  
建昌德安地方亟應調撥兵勇圍攻隨卽飛飭

署遊擊景星統帶各路兵勇折回建昌並由省  
派撥練勇五百名馳赴建昌德安兩路夾擊一  
面飛咨署九江鎮總兵羅玉斌扼要堵截所有  
附近之靖安奉新安義等縣亦令該地方文武  
調集鄉團協同防範俾免闖入爲害其吳錫光  
所帶靖勇現在飭催迅將桃樹塢一帶匪徒剿  
辦事竣從義甯東路徑趨武甯遊擊景星兵勇

俟建昌德安匪徒擒捕淨盡兼程赴武實力搜  
勦並令趙如勝等督率戰船水勇嚴密籌防以  
杜匪艇上竄之路惟聞湖南水陸各軍業已進  
紮螺山勦敗餘匪大半偪入江境以致義武兩  
路日見緊急其下游東西梁山又經紅單船攔  
截江面逆艘不能竟達金陵停泊安慶船隻無  
數亦有回竄江右之謠是此時江省情形最爲

三  
喫重臣惟有激勵士卒將內竄寇氛次第蕩平  
再以全力嚴守水陸要隘用固藩籬俟湖南舟  
師東下卽撥戰船出湖會勦以靖江面奏入

上命軍機大臣傳諭陳啟邁曰義甯敗竄餘匪復由楚  
北勾結逆黨於瑞昌武甯一路竄擾建昌德安經陳  
啟邁添調兵勇馳往夾擊自應嚴飭該帶兵員弁趕  
緊進攻先將此股匪黨悉數埽除卽可與吳錫光所

帶靖、勇會勦武甯之匪。該撫所籌布置各情，卽著照議相機妥辦。惟水陸兩路面面空虛，皖楚逆蹤，誠不免伺隙奔突。節次諭令該撫多備師船出江扼截，以顧全局。若待湖南舟師東下始行出湖協勦，未免迂緩。卽新募水勇，未諳紀律，亦應卽速訓練，遴委水師員弁，剋日管帶出江，俾資截勦，斷不准屢以餉需支絀藉口遷延。



三十一  
二十五日

辛酉

楊需奏言八月十六日探報賊匪

由白水湖駛入野豬湖至三叉埠賊衆二三千人登岸焚燒民房當卽派兵迎擊該匪望風竄退避匿湖中十七日賊分東西南三路撲營約六七千人當派兵勇分路迎敵東路賊衆直前攻撲臣親自督戰河州都司平德督兵施放連環槍礮轟斃賊匪數十名賊始稍退南路爲伏

勇所擊劉富成兵勇又從後抄至賊匪三面受敵我軍合圍追殺二十餘里直抵野豬湖邊賊衆紛竄入船乘風開駛計各路兵勇先後殺賊五百餘名生擒二十九名偏入湖中撲水淹斃者無算惟賊船尙匿湖中未能卽時掃蕩仍當設法趕緊辦理本日接據探報漢川賊匪由涓口駛入湖中已飭遊擊趙鴻舉等加意防堵毋

令竄入德安府河並再派兵前往接應現在賊  
勢全夥北趨漢川黃陂一帶水陸屯聚窺伺衝  
突連日探報武昌漢陽賊衆無多現已飛飭魁  
玉楊昌泗會同升用道李孟羣等乘此武漢空  
虛速行攻復臣嚴堵北竄一面趕辦船隻設法  
勦辦

楊需又奏言京山逆匪抗踞佛祖山其地山深

路隘我軍道路不熟未敢深入適有被脅之田  
三盛卽田連升率百餘被脅之民投誠因卽令  
爲嚮導繞道由古樹嶺進攻八月初一日黎明  
行至太和集賊匪率衆來拒都司劉富成揮兵  
縱擊賊匪敗退追至佛祖山踏入賊巢斬賊三  
百餘名初二日追至蘇家湖邊該逆因無船難  
渡折回死鬪我兵痛加勦洗又斬五百餘名餘

衆盡撲湖中淹斃初四日復督兵勇搜捕四路  
餘匪剿除淨盡其賊首孔昭溶卽孔洛三劉花  
子白方氏卽白娘子均已伏誅京山境內肅清  
天門匪亦無多初八日接李孟羣來稟該道督  
帶湖南水師船隻已於二十七日行抵金口接  
仗獲勝塔齊布陸路之師尙攻勦崇陽咸甯未  
下臣飛飭該道卽會同魁玉楊昌泗進攻武昌

一面催備船隻渡湖前進旋據探報賊復屯聚漢川縣城及繫馬口等處並有賊船數百窺伺涓口一帶地方臣恐其竄入涓口飛飭長江準兵勇加意嚴防將進攻蔡店之勇暫行停止以防涓口並飛咨官文將四川練丁一千名就近飭赴岳家口一帶接應堵剿飭沔陽州蕭蔭恩同知林天直督帶練勇馳赴仙桃鎮一帶會合

川陝各兵相機進取賊匪以南師日偏全力北趨不得不嚴爲防備稍事持重臣現派兵設法趕將湖中賊船焚燒擊毀然後可以放心前進奏入

上命軍機大臣傳諭官文楊需曰此次逆匪分撲楊店營盤經楊需督率弁兵勦擊大獲勝仗我軍追殺直抵野豬湖邊賊船現匿湖中漢川之賊亦由涓口入

湖該署督現飭遊擊趙鴻舉等加意嚴防並派兵接  
應著卽嚴飭該員等實力防剿毋令竄入德安府河  
致滋延蔓前經疊次諭令楊需迅速進兵克復武漢  
現據奏稱賊勢全夥北趨於漢川黃陂一帶水陸屯  
聚武漢之賊已爲數無多自因上游剿辦得手故該  
逆鋌而走險意圖北竄爲牽掣我兵南下之詭計楊  
需此時自應權其緩急先將北路布置周密然後節



節進攻固不可遷延觀望坐失事機亦不可深入重地致該逆乘虛北竄方爲妥善其武漢之賊本日已諭令塔齊布曾國藩水陸並進迅圖克復該署督亦卽嚴飭魁玉楊昌泗會同李孟羣合力夾擊如能克復武漢則賊巢已破剿辦自易得手其湖中賊船務當趕緊設法全數燒燬毋令久踞荊州現在防堵情形較緩楊需所帶兵勇尙形單弱所有前留荊州之

四川練丁一千一百餘名著官文儘數撥調速赴楊  
需大營再留荆之防兵能否抽撥助剿並著官文酌  
量選派以資剿辦

上又命軍機大臣傳諭塔齊布曾國藩曰前據塔齊布  
等奏羊樓洞剿賊大獲勝仗並曾國藩搜捕湖河進  
駐嘉魚擬赴金口會剿各情形當經批令速戰勿令  
塔齊布一軍爲崇陽所牽掣原以逆賊恃武漢爲老

巢若能急破其窟穴則漢江以下餘匪自可迎刃而解本日據楊需奏京山賊黨已被大軍勦滅惟由白水湖竄駛野豬湖之賊竟於八月十七日分三路攻撲楊店營盤經官兵迎敵擊退賊船伏匿湖中並據探報漢川逆衆有從潰口入湖消息大抵楚省賊情南擊則北竄鋌險狂奔是其慣技朕思崇陽一股經普承堯羅澤南等攻破賊卡後計已膽寒惟曾國藩

必俟此股藏事方攻武漢兩下相持若逆匪另行詭  
謀則全勢北趨恐楊需兵勇過單未能遏其兇燄而  
曾國藩所帶均係師船水戰有餘陸攻不足務須與  
塔齊布妥籌兼顧水陸並進爲克復武漢之計該提  
督是否能親來督勦或抽派陸路得力將弁與曾國  
藩會合之處均著迅速商辦總以搗穴擒渠不被牽  
掣爲要李孟羣已抵金口魁玉楊昌泗亦前往武昌

亟當乘此聲威各路並舉諒塔齊布曾國藩接奉此旨必能趕緊進兵勿但專顧一隅也

上又命軍機大臣傳諭英桂曰湖北賊匪自我兵克復安陸府城後竄回京山本月初閒經楊需督飭官兵全行殄滅京山境內肅清天門餘匪亦已無多現由漢川一帶進剿湖南水師行抵金口接仗獲勝距武昌省城僅數十里計日即可與北師會合攻克武漢

所辦尙爲得手惟是賊以南師日偏勢必全力北趨  
亡命鋌走亟應嚴爲防備且漢川之賊又已竄入涇  
口窺伺之意顯然漢川黃陂一帶路徑紛歧賊匪均  
可竄逸北窺信陽等處楚豫界連防守尤關緊要英  
桂現駐信陽疊據奏稱飭派兵勇在各邊境嚴密布  
置著卽於信陽武勝等關加意嚴防毋許稍涉疏虞  
至楚省情形仍應隨時偵探與楊需聯絡聲勢隨時

戒備豫爲併力堵剿之計

二十七日癸亥勝保德勒克色楞善祿崇恩奏言

高唐州城勢已垂破臣連日加緊圍攻晝夜用大礮轟擊城垣坍塌日甚而賊守愈嚴並乘夜於缺口暗用土袋樹枝修補臣因於礮臺以前加築馬道以便乘機填濠入城二十日夜親督夫役前往興修賊於三十一日夜由城濠突出

百餘人連拋火彈火罐直衝馬道天津山東兩翼步隊官兵分抄前進將賊擊退次日二更後逆衆潛出分路撲我新營勢甚兇很幸新募川勇及天津官兵冒死迎敵一時之久逆賊死傷甚多始行退散回至城下新築馬道之地欲行平毀甫經近前地雷炸礮同時觸機轟發伏兵乘勢壓下隨路剿殺傷斃約百餘人二十三日



賊由東門撲出又分股撲出南關意欲衝突奪路而逃亦經我兵擊回統計兩日之內斃賊一百數十名然皆楚粵老賊多殺一賊城卽易破一日臣等惟有乘此聲威竭力設法進攻總期數日之間力圖克復早慰

聖心奏入

上命軍機大臣傳諭勝保德勒克色楞善祿崇恩曰勝

保圍攻此城已歷數月之久此次殲斃之賊不過百數十名而我兵亦有傷亡竟不能以智謀取勝現既據稱機有可乘期於數日之間力圖克復該大臣自係確有把握儻令垂斃之賊伺隙他竄或仍留一路任其奔突又煩追剿勢必蔓延他處何時方能淨盡此時賊勢自非從前臨清烏合之衆可比彼時來之甚速故驅之甚易今則負隅日久必用全力以制之

該大臣惟當妥籌就地剿除之法迅將此股逆衆聚而殲旃庶可以功補過著卽與德勒克色楞等乘此聲勢激勵各營將弁倍加奮勇剋日攻復朕惟盼捷音之速至也

二十九日 乙丑 楊需奏言八月二十四日據遊擊

趙鴻舉軍功李玉田等稟報賊船四五百隻駛至劉家隔地方上竄趙鴻舉等督帶兵勇迎至

道人橋分三路勦擊殺斃賊匪二千餘人生擒  
賊目十七名燒燬賊船三百餘隻奪獲賊船六  
十餘隻餘匪散竄又據蘄水縣際亨稟報八月  
初三日帶羅田縣練勇二千名收復蘄水廣濟  
二縣城池擒斬賊匪四百餘名又據羅田縣彭  
仲芳稟報派勇會同安徽英山縣收復城池勦  
滅賊匪又委員楊先澍率敢死士五十餘人潛

近野豬湖賊船拋擲火罐李殿善由東岸施放  
火箭焚燒賊艦數隻賊衆驚覺四散二十一日  
賊匪於湖口泊船設卡楊先澍於二更後帶勇  
改裝潛至附近湖邊之村莊見賊船五十餘隻  
灣泊湖岸有長髮賊匪數十人分踞村內民房  
楊先澍卽帶勇突出圍房縱火將民房焚燒並  
將船隻燒燬斃匪四五百人本日據千總楊世

澤等稟報在羅漢寺塘步等處乘夜襲擊賊匪  
斬殺一百餘名生擒三十餘名追逐三十餘里  
至大湖嘴地方撲水淹斃者無數又據潛江縣  
龔煥枝稟報探聞漢川縣繫馬口賊匪經沔陽  
州鄉勇勦擊獲勝又接曾國藩來咨於初八初  
十十二等日水陸進攻連獲勝仗定於十七十  
八十九二十等日直擣武昌臣當卽飛咨以賊

匪大股在北必可乘虛攻復並飛飭魁玉楊昌  
泗迅卽進攻漢陽二十二三兩日東南礮聲竟  
日不絕夜半見有火光必已得手惟漢川黃陂  
一帶地方賊衆尙有萬人一經武漢收復必尙  
有北竄之賊臣一面飛遣偵探一面飛飭參將  
常德相機堵剿漢川之賊飭趙鴻舉李玉田嚴  
防長江埠縣丞王國楨軍功王瑞山丁心田堵

勦新溝一帶佈克慎帶兵進駐潯口桂明分兵  
進駐馬溪河劉富成駐紮孝感楊世澤等駐紮  
黃陂以遏四竄之賊又飭黃州府許廣藻於黃  
岡麻城等縣督帶鄉勇嚴行堵勦乘勢收復黃  
州府城派兵扼守以冀一氣掃除勿使稍有竄  
逸正繕摺間據職員楊衍桐遣報二十二日南  
北省官兵水陸進攻漢陽當卽帶同商民等數



千人接應賊衆驚散卽日克復漢陽漢口二十三日克復武昌省城賊匪分路逃竄約計尙有萬餘人各等語理合先行奏陳以慰

聖懷奏八

上命軍機大臣傳諭楊霈曰我兵自勦滅京山賊匪以後卽將蘄水廣濟羅田等縣被賊占踞各城先後攻克現聞漢陽漢口武昌均經克復惟未將攻勦情形

詳細敘及究係何路官兵攻克何處曾國藩等所帶兵船是否與陸兵同時並進得以迅速奏功據稱潰逃餘匪尙有萬餘現向何路奔竄亦未詳晰聲敘逆匪既有四散之勢卽須籌分路追剿並杜其北竄之計雖漢川之賊有常德堵剿長江埠新溝一帶有趙鴻舉王國楨等防堵該署督又已分飭佈克慎進紮潯口桂明分駐馬溪河劉富成往紮孝感楊世澤等

往紮黃陂布置尙屬周妥而黃州郡城久爲賊踞許  
賡藻所帶僅係鄉勇未必可恃以收復楊需卽可調  
得勝之師前往黃州一路相機勦辦該處距孝感黃  
陂等處不遠卽佈克慎桂明劉富成等四路截勦之  
師均可就近扼擊該署督統領全軍務當通籌大局  
將楚北餘匪悉數埽除其武漢江面應否酌留水師  
扼守之處並著與曾國藩等酌議布置並將攻克武

漢情形迅速馳奏至九江安慶尙爲賊匪淵藪已諭  
令和春福濟陳啟邁加意嚴防仍著楊需不分畛域  
互爲聲援毋稍大意

上又命軍機大臣傳諭陳啟邁曰本日據楊需奏探聞  
官兵克復漢陽漢口二十三日克復武昌省城現在  
賊匪分路逃竄約計尙有一萬餘人逃往何處並未  
據明晰聲敘亦未據塔齊布曾國藩奏到該匪被剿

緊急難保不乘隙竄入鄰省現在江西武甯等處賊  
匪未就肅清九江尙爲賊踞若該逆豕突狼奔勾結  
蔓延爲患甚鉅著陳啟邁於江西湖北毗連處所迅  
卽派委將弁督帶兵勇扼要駐紮加意嚴防毋令賊  
匪竄入境內致滋紛擾

上又命軍機大臣傳諭和春福濟曰本日據楊需奏官  
兵克復漢陽漢口二十三日克復武昌省城現在賊

匪尙有一萬餘人分路逃竄情形若何尙未據塔齊  
布曾國藩奏到該逆被剿情急難保不亡命狂奔勾  
結皖省逆匪蔓延爲患著和春等派委得力將弁帶  
領兵勇於安徽湖北毗連處所扼要嚴守加意防範  
毋令賊匪竄入剿辦更難得手至廬州等處賊匪被  
官兵屢次攻剿疊獲勝仗勢極窮蹙著卽督飭兵勇  
奮力圍攻務當一鼓殲除迅圖克復毋致再有竄逸

安慶一帶賊匪尙未殲滅卽著飭令秦定三迅速勦辦毋稍延緩

上又命軍機大臣傳諭塔齊布曾國藩曰楚北賊匪本恃武漢爲老巢現已破其巢穴則下游餘匪自易勦除惟分竄賊匪尙有萬餘人塔齊布曾國藩等水陸各軍如何勦辦此股餘匪究竟竄往何處本日已諭令陳啟邁及和春等一體嚴防該逆被勦窮蹙豕突

狼奔蹤跡靡定且漢川黃陂一帶賊匪尙多尤慮勾結爲患楊需駐紮楊店現已諭令進攻黃州趕緊克復並嚴防逆匪北竄塔齊布剿辦崇陽一股是否已就肅清此時武漢收復後卽可會合曾國藩水師併力東下廓清江面該提督等務當與楊需妥商籌辦勿令東下之師爲楚省零匪所牽掣